

陶雲汀先生奏疏

奏摺卷七目錄

撫皖稿

安化陶

查覆皖省被水各屬來春應需接濟籲請加賑摺子

潛山宣城紳士捐賑請免動

帑摺子

附奏遵

旨暫緩入

覲摺片

皖省試用佐雜人員壅滯請暫停分發摺子

附奏嚴飭緝獲盜匪摺片

御賜福字暨麕肉鹿腿謝

恩摺子

恭謝

頒賜

欽定大清會典全部摺子

恭謝

頒賜

御製養正書屋全集摺子

議覆蕪湖鳳陽兩關樁務分賠章程摺子

請借

帑興修無爲州江壩摺子

查勘靈璧縣減黃引河借項興挑摺子

江督河督會稿

請將鳳潁泗三府州屬遣軍流徒秋審各犯酌

歸巡道審轉摺子

總督會稿

續查未豁賠款遵議追補摺子

查覆皖省被水各屬來春應需接濟

摺子

奏爲遵

旨查明安徽省懷寧桐城等十七州縣被水各保來
春應需接濟情形恭摺籲懇

天恩加賑事竊臣承准軍機大臣字寄道光三年十
月初三日奉

上諭安徽銅陵等三十八州縣被水已據該撫奏明
隨時撫卹及委員查勘亦著迅速辦理並將來春
應否接濟之處一併查明於封印前奏聞將此諭

知等因欽此仰見我

皇上垂厯災黎

恩施優渥有加無已跪誦之下欽感難名伏查安徽
省夏秋被水被旱勘明銅陵無爲當塗宣城南
陵蕪湖繁昌望江桐城和州懷寧宿松貴池青
陽東流廬江巢縣含山全椒潛山來安鳳陽盱
眙天長等二十四州縣并屯坐各衛成災五六
七八九分及勘不成災不等經

臣

奏蒙

聖慈分別蠲緩按分給賑并

賞給口糧其壽州鳳臺滁州合肥舒城建平太湖涇
縣靈璧泗州五河懷遠寧國旌德太平等十五
州縣分別請緩新舊錢漕遍貼謄黃曉諭各災
區普被

恩施無不同聲感頌茲復欽奉

諭旨垂詢來春應否接濟

臣

與藩司徐承恩督屬詳

加體察除勘不成災之壽州鳳臺滁州合肥舒
城建平太湖涇縣靈璧泗州五河懷遠寧國旌
德太平等十五州縣被災本輕毋庸查辦又成
災之潛山宣城二縣現據紳士丁耆捐銀助賑

請免動項經 臣另摺具

奏亦可毋庸接濟又青陽縣祇有六處成災現已
給賑民間不至拮据又懷寧縣五分災十二保
桐城縣勘不成災四十一保宿松縣五分災六
莊望江縣勘不成災一寺當塗縣勘不成災一
百五十九村莊蕪湖縣勘不成災四圩埭繁昌
縣勘不成災四十二冲壩廬江縣勘不成災五
保巢縣五分災三十五處全椒縣勘不成災三
圩來安縣五分災十八圩和州勘不成災五都
鳳陽縣五分災八十一保勘不成災三十五保

盱眙縣五分災一百保勘不成災二十七保天
長縣五分災三十八鎮勘不成災九鎮皆被災
較輕所有新舊銀米業已蒙
恩分別蠲緩並蒙將五分災貧民

賞給一月口糧民力已紓來春青黃不接之時皆毋
須接濟至懷寧桐城宿松望江南陵貴池銅陵
東流當塗蕪湖繁昌無爲廬江巢縣全椒和州
含山等十七州縣之成災六七八九分各區情
形本重各災民及屯坐各衛軍丁今冬得有賑
卹口糧足資果腹但恐來春青黃不接相距麥

秋尙遠仍不免有乏食之虞合無仰懇

皇上逾格

鴻慈俯將懷寧縣成災七八分四十四保極次貧桐
城縣成災七分九分九十保極次貧并六分災
十四保極貧宿松縣成災七八分二十莊極次
貧望江縣成災七八九分十六寺圖極次貧南
陵縣成災七八九分一百三十五圩埠極次貧
貴池縣成災七八分二十五保並牛頭等三十
八洲極次貧銅陵縣成災七八九分十四耆並
荷葉等十四洲極次貧東流縣成災七八分三

十七保極次貧當塗縣成災七八九分三百八
十三圩埠極次貧蕪湖縣成災八九分一百二
十二圩埠極次貧繁昌縣成災七八九分一百
四十七圩埠極次貧無爲州成災七八九分四
十五里集極次貧廬江縣成災七八分十六保
極次貧并六分災十保極貧巢縣成災七八分
二百二十七圩極次貧全椒縣成災六分五十
二圩極貧和州成災七八九分二十都二坊極
次貧并六分災九都極貧含山縣成災七八分
十三都共一百六圩三灘極次貧并六分災三

都共十八圩二灘極貧並屯坐各衛飢軍均於
來春青黃不接之時

加恩展賞一月口糧以資接濟如蒙

俞允所需賑糧以銀折給在於司庫正項銀內動支
各衛飢軍貧生兵屬悉照正賑之例一律辦理
仍飭各州縣覆查確實按數散放務期
帑不虛糜民沾實惠以仰副

聖主惠愛黎元

恩施靡旣之至意所有遵

旨查明來春接濟情形據藩司徐承恩議詳前來

臣

覆查無異謹會同協辦大學士兩江總督臣孫
玉庭恭摺具

奏再泗州衛有坐落高郵寶應二州縣田地本年
係勘不成災來春應否接濟俟江蘇省知照到
日一體辦理合併陳明伏乞

皇上聖鑒謹

奏

道光三年十二月初四日具

奏四年正月初八日奉到

硃批候旨行欽此

潛山宣城紳士捐賑請免動

帑摺子

奏爲潛山宣城兩縣紳士捐貲助賑援案請免動
帑恭摺具

奏仰祈

聖鑒事竊照安徽省本年雨水過多江潮泛漲被淹
各處田廬蕩析情形困苦業經

臣

奏請撫卹一面通飭各屬勸捐賑濟嗣據各州縣
勘報災分復經

臣

按被災輕重分晰具

奏仰蒙

恩旨賞給賑銀口糧俾災區人人得所現已刊刷騰
黃通行各屬正在詳查戶口領銀散放間接據
潛山縣知縣常景周稟稱據生員許世洙黃仁
夫等呈稱縣境夏秋被水泛溢入城仰荷
皇恩撫卹今又奉查戶口

賞給口糧人心歡定閭里帖然感沐

恩膏莫知所報惟自奉飭勸捐之後城鄉感動其稍
有力之家莫不義形於色圖報

聖恩共敦桑梓截至十月底已捐銀二萬餘兩計潛
邑成災三十三保大小飢口五萬有零以捐項

買米散放大口每日給米三合小口折半冬春
兩賑足敷濟用未敢再糜

帑項伏乞轉稟等情察其詞言懇切似可俯順輿
情請免動

帑又據宣城縣知縣朱錦琮稟稱據歲貢生張其
錦生員徐兆蘭沈驥張正及耆老商民等呈稱
生逢

盛世久沐

皇仁豐稔之年貢賦厥有定則災歉之歲
恩施惟恐不周今夏水潦成災仰荷

聖恩撫卹又奉倡捐現在詳查戶口蒙

恩賜賑

仁施所被無不觀感解囊查四鄉災口共一十二萬
有奇公捐之項已有七萬餘兩計易錢勻放冬
春二賑每大口給錢六百文小口折半足敷賑
濟之需捐雖出於下情

恩實得之自

上小民既得公捐豈可復糜

帑項不揣冒昧瀝陳下悃等情查該紳耆等紛紛
具稟出自至誠伏乞俯順輿情免動

帑項等語又據宣州衛守備蔡廷元以該衛屯坐宣城縣貧軍亦經衛籍紳丁捐助銀兩稟請歸宣城縣一律捐辦等情並據藩司徐承恩轉據安慶府知府汪恩寧國府知府郭承恩詳稱潛山縣成災五分以上及勘不成災宣城縣成災七八九分茲以公捐之項足敷賑濟具見各紳士急公好義該令等勸諭有方詳請具

奏前來

臣

查潛山宣城兩縣均被水災一聞勸諭

捐輸俱各爭先恐後茲潛山縣已捐銀二萬餘兩宣城縣已捐銀七萬餘兩屯坐衛丁亦有捐

輸均足敷賑濟之用該紳士等誼敦任卹好義
可風仰維

聖主念切民依如傷在抱

洪慈所被草野從風以故觀感奮發各出其肫懇之
意以惠鄉里而廣

皇仁竊以爲安貧保富助賑之費雖微而講讓型仁
向善之心足取伏查嘉慶十九年六安州紳士
捐貲助賑請免動

帑曾經奏奉

諭旨允行有案今潛山宣城紳士懇求捐貲助賑臣不

敢塞於

奏

聞惟有仰籲

天恩俯如所請辦理邀免動

帑恭俟

命下之日飭令藩司將潛山宣城二縣及屯坐宣城
縣衛軍賑需扣除動項至該紳士等所捐銀兩
現當辦賑之際未便遲延臣已一面飭令該縣
等妥爲督率稽查聽各紳士自行挨名散放毫
不假手吏役惟事由捐辦應請免其造冊報銷

以歸簡便其捐輸銀數姓名統俟事竣查明照
例奏請

旌敘潛山縣知縣常景周宣城縣知縣朱錦琮撫綏
得宜民心悅服開誠勸捐同聲踴躍應俟督辦
賑務完竣暨各屬申辦災認真出力之員一并
查明另請

恩獎以示鼓勵所有潛山宣城兩縣紳士丁耆稟求
捐賑請免動

帑緣由謹會同協辦大學士兩江總督臣孫玉庭
合詞恭摺具

奏伏乞

皇上聖鑒訓示謹

奏

道光三年十二月初四日具

奏四年正月初八日奉到

硃批如所請行欽此

附奏遵

旨暫緩入

覲摺片

再臣前將趕辦要務俟封印後遵

旨入

覲緣由附片具

奏十一月二十一日承准軍機大臣字寄道光三年十一月初五日奉

上諭本日據陶澍奏現將應辦事務趕緊查辦遵旨於封印後來京陛見等語本年安徽省州縣大半

被災現在挨放賑銀稽查戶口以及籌畫兵精督
修江壩事務較繁且係大計年分考察各官關係
尤重著該撫督率認真辦理毋庸來京俟明年封
印後再來京陛見可也將此諭令知之欽此跪誦
之下仰見我

皇上慎重災區整飭吏治

訓誨周詳莫名欽感伏查本年皖省三十九屬被災
內中應行給賑及散放口糧之處稽查戶口實
爲目前至要之務稍有疎率卽難免遺漏混冒
臣屢次嚴飭印委各員務須戶必親到口必親

驗極貧次貧細爲體察於查竣一保之後卽將
通保飢口姓名及應領銀數張榜曉示俾災黎
共見共聞刁民猾吏自無從染指現據各屬陸
續領銀散放臣與藩司徐承恩商酌卽飭該管
道府就近抽查將榜示與災冊按地按人細爲
核對稍有混冒無難立時查出仍一面密加察
訪如果印委各員實心實力弊絕風清卽分別
存記留俟保薦倘辦理不善卽撤省

奏參另行委辦至來歲緩缺兵糧已據委員曹攀
華萬年淳等將採買江楚米石陸續載回分撥

本省及江寧等處兵匠之用足供支放其江壩工程亦已催飭勘估迅速動工至本年

計典現據各道府將所屬各員賢否密函開報

臣

復就其平日之辦事官聲細爲參考務當一秉至公明昭激勸使觀感儆畏共勉循良以仰副聖主澄敘官方之至意所有接奉

諭旨欽遵辦理緣由理合附片覆

奏伏乞

皇上聖鑒謹

奏

道光三年十二月初四日片

奏四年正月初八日奉到

硃批知道了欽此

皖省試用佐雜人員壅滯請暫停分發摺子

奏爲安徽省試用佐雜人員現在壅滯請

旨敕部將各項捐納人員暫停分發以期疏通事竊
照捐納佐雜人員分發各省試用輪班補缺既
可試其才能該員等亦得藉資練習原於公事
有益惟缺有定額人無定數如皖省佐雜補缺
或四五年或八九年甚有遲至一二十年未能
輪補者人數本屬不少近因各省請停分發以
致續發來皖人員日多倍形擁擠不特補缺無
期卽輪班委署亦非四五年不能一次旅費乏

賁無從調劑更恐日久累深偶遇派委或致藉
事生端殊於吏治攸關查安徽省布政司經歷
庫大使按察司司獄及直隸州州判府屬州同
府經歷照磨縣丞主簿吏目巡檢典史等項共
一百六十四缺現在各班除已咨補並丁憂告
假等項離省人員不計外現在省試用者共有
一百九十一員約計十數年內難以補竣伏查
直隸等省前因佐雜人數過多

奏請暫停分發均蒙

俞允在案現在安徽省試用佐雜人員過於壅滯似

應量爲疏通據兩司會詳前來臣細加察核係屬實在情形相應請

旨敕下吏部將捐納布政司經歷庫大使直隸州州判府屬州同府經歷縣丞主簿吏目從九品未入流十項人員暫停分發安徽俟現在試用人員稍爲疏通內中何項人員將次補竣卽將何項人員仍請照常分發庶在省試用人員得以漸次挨補而各該員補缺有期益知謹飭自守於地方吏治均有裨益至各項議敘分發人員人數無多補缺各有班次仍請照常分發於選

政並無窒礙 臣謹會同協辦大學士兩江總督
臣孫玉庭合詞恭摺具

奏伏乞

皇上聖鑒訓示謹

奏

道光三年十二月初九日具

奏四年正月十一日奉到

硃批另有旨欽此同日奉到道光三年十二月二十
六日內閣奉

上諭陶澍奏試用佐雜人員壅滯請暫停分發一摺

安徽省現在佐雜人員在省試用者共有一百九十一員補缺實形壅滯著照所請交吏部將捐納布政司經歷庫大使直隸州州判府屬州同府經歷縣丞主簿吏目從九品未入流十項暫停分發安徽俟現在試用人員稍爲疏通內何項人員將次補竣卽奏明照常分發至各項議敘分發人員人數無多補缺各有班次著仍照常分發欽此

附奏嚴飭緝獲盜匪摺片

再臣前次訪有潁鳳等處積惡匪徒當派員弁拏獲趙四老虎等二十餘名節次附

奏在案尙有張七等在逃

臣

復嚴飭勒緝茲據宿

州知州蘇元璐稟稱將張七拏獲訊認爲匪屬實又訂期會同亳州在於交界處所巡哨另獲匪犯張六王破趙年趙萬劉狗范生王五曹經曹明志曹景沅張尿等十一名現在嚴審究辦並據亳州知州任壽世稟獲趙西城一名訊係行劫碭山縣事主董發祥案內逸盜又獲王二

一名訊係行劫太和縣事主王同聚案內盜犯
均有各該縣緝役協拏已解歸犯事地方審辦
又據泗州州判宋盛麟稟同州役營兵盤獲匪
犯沈魁曹二劉潮金顧大顧三王起盈王老漢
等七名並搜獲鐵銃長鎗鐵尺鐵鑿等具訊係
向在淮湖等處乘船滋擾現俱嚴審究辦至皖
省江面延袤六百餘里時屆嚴冬宵小易生經
臣嚴飭沿江州縣設卡巡緝並添派幹員分段
巡查現據委員劉際昌標弁王應魁等稟稱沿
江上下晝夜梭巡並無失事惟巡至和州鮎魚

嘴地方時近昏黑有盜潛上客船持刀扭砍客商該員弁等當同該州兵役趕往圍拏盜匪持刀逃走追陷泥中當被擒獲查詢該犯名胡和尚又名胡高腳其同夥奚義全朱升等攜帶妻室詭易姓名逃至鳳陽縣界亦經和州丁役協同該縣盤獲解審其餘各屬均屬安靜臣仍嚴飭各員弁始終勿懈以除稂莠而靖地方合併附片以

聞謹

奏

道光三年十二月初九日具

奏四年正月十一日奉到

硃批查拏甚屬認真知道了欽此

御賜福字暨麇肉鹿腿謝

恩摺子

奏爲恭謝

天恩事道光三年十二月二十一日摺并回省齎奉

恩賞

御書福字一幅暨麇肉鹿腿等件謹卽出郊跪迎至

署望

闕叩頭謝

恩祇領欽惟我

皇上昭景延釐

撫辰納祿

鴻疇嚮五

福錫而

帝範平康鹿雅歌三

德飽而人情和樂迎年

履吉

璇毫標百順之名隔歲

頒春

嘉貺表四靈之瑞

臣

親依

聖世渥荷

稠恩每念歷碌於庸材策駑而慚方穀況聽謦音於
中澤懸貍而凜素餐

福祿同沾竊共皖民而拜

賜

升恒共祝欣同僚采以向

榮從茲彩溢

龍鸞五色煥圖書之府更卜祥呈磨礪八方瞻

仁壽之符所有

臣

感忭下忱謹繕摺恭謝

天恩伏乞

皇上聖鑒謹

奏

道光三年十二月二十四日具

奏四年正月二十二日奉到

硃批知道了欽此

恭謝

頒賜

欽定大清會典全部摺子

奏爲恭謝

天恩事頃由提塘遞到

頒賜

欽定大清會典全部臣謹卽出郊跪迎至署望

闕叩頭祇領欽惟我

皇上紹

庭出治績

聖綏猷始和懸象魏之書陳常時夏無逸式康田之
訓敷錫庶民

直聰明而作之

君

師政惟由

舊觀會通以行其典禮善必稱

親仰惟

仁宗睿皇帝拊本引綱斟元

立極

大廷

授璽

一心孚

六聖之傳冊府鑄珍四輯會

三朝之典百九十餘年之掌故咸搜採而入

裁成千一百餘卷之牙籤悉緝綬而歸

折衷規模既富典則咸昭

謨丕顯而

烈丕承聿著

經綸於

駿造

述者明而

作者聖爰徵

佑啟於

鴻圖

臣獲覩

崇編欽承

渥賜安上治民莫如禮體本

心精經天緯地謂之文粲如眉列嚮以福威以極敷
彝教而是訓是行遠乃猷裕乃民紹

德言而用康用保變而通之盡利損益可知識其大者

爲賢方策具在若稽古重華協于帝迪乃

前光繼自今立政用以人

聖惟時憲所有臣欽誦感忭下忱理合繕摺叩謝

天恩伏乞

皇上聖鑒謹

奏

道光四年正月二十四日具

奏二月二十五日奉到

硃批知道了欽此

恭謝

頒賜

御製養正書屋全集摺子

奏爲恭謝

天恩仰祈

聖鑒事竊

臣齋摺差弁回皖捧到

頒賜

御製養正書屋全集謹郊迎至署望

闕叩頭焚香跪讀欽惟我

皇上德秉生知

學承

彝訓嘉名

肇錫

元良孚

默簡之心養正

親題

聖教揭誠存之本迪

心傳而

念典紹

皇極以

敷言

廣和

天章復旦著星雲之燄

闡揚經義爲章垂日月之華論世知人義歸懲勸因
文見道體貫箴銘蓋游藝所以

養心聿徵志道據德依仁之效而

作聖必先正己爰括興詩立禮成樂之全

盛德備極其形容

雅化宏敷夫

聲律竊幸

鴻文先覩勝誦湯盤禹鼎之詞伏願
聖敬日躋彌光

樂善

味餘之盛所有臣忭誦欽感下忱理合恭摺叩謝
天恩伏乞

皇上聖鑒謹

奏

道光四年正月二十四日具

奏二月二十五日奉到

硃批知道了欽此

議覆蕪湖鳳陽兩關權務章程摺子

奏爲遵

旨查議蕪湖鳳陽兩關權務情形併分賠章程請照
舊勻攤恭摺覆

奏仰祈

聖鑒事前准部咨欽奉

上諭本日軍機大臣會同戶工二部議奏徵收關稅
一摺各關稅課之盈絀由商貨之多寡而裕課必
先卹商卹商必先除弊乃近聞各關奸丁蠹吏勒
徵賣放及以正作罰上下分肥加之奸商偷漏繞

越糧船包攬夾帶百弊叢生虧短日甚轉藉口年
歲歉薄商貨短少試思商民貿通有無往來絡繹
斷不致逐年大相逕庭總由經徵各員任聽丁胥
人等例外橫徵通同舞弊以致商人裹足不前於
榷務大有關係著各省督撫將各關因何虧短及
商貨如何流通查明妥議章程具奏並著漕運總
督嚴禁糧船夾帶毋致有妨正課各關監督務須
激發天良毋得假公濟私盡飽囊橐卽將各口岸
家人大加裁減嚴行約束如有仍前耗費藉端擾
累情事由該督撫據實嚴叅毋稍徇縱如奸商有

偷漏之弊亦卽懲辦以儆刁風至另片奏各關分
賠章程並著各督撫就近察看情形應否照舊勻
攤或仍遵新例各按各任賠補之處一併妥議具
奏欽此遵查安徽省設立蕪湖鳳陽兩關向來收
稅均有定則刊載木榜通行曉諭凡貨物到關
隨到隨驗按則稽徵尙無留難勒索及以正作
罰之事其奸商偷漏繞越與糧船夾帶亦俱隨
時隨地相機整飭俾知斂戢家人一項蕪關地
近無須派查鳳陽關地方遼闊間須派往亦尙
無多惟兩關書吏除額設經制外其餘書舍及

清繕等書歷因辦事差遣不敷逐漸增添此輩
多一人卽多一家之累自應隨時澄汰前經
飭令關員除經制額缺應補外其餘書舍清繕
等缺出以一缺遞行拔補以一缺裁汰庶人數
減少漸復舊額而弊源亦塞矣又包攬之弊惟
鳳潁一帶往往有奸牙盤踞假過載爲名勾串
包攬遇有不願投行之客亦強令包攬併有預
支商人銀兩臨關不能交還以致商人坐待需
時此等奸牙實爲關蠹間有生監違例冒充者
現在迭飭訪查究辦務令商人自封投櫃免滋

擾累至兩關耗費近來均加裁省如每歲解存
安慶府庫辦公銀兩卽係節省關上酒食鋪墊
一切浮費以爲巡撫及臬司衙門書吏工食併
心紅紙張差盤巡江等項之用歷經前撫臣程
元章陳大受納敏衛哲治奏明並經前撫臣胡
克家飭議定數蕪關計七千餘兩鳳關計二千
餘兩但取辦公而止並無浮濫其撫署公費亦
經前撫臣李鴻賓奏明劃出銀四千兩解交藩
庫爲緝捕經費歷年以來均屬有減無增惟當
督率經徵道員力敦節儉杜絕虛耗併體卹商

情嚴防滋擾一切凜遵

諭旨實力奉行關務自更有起色應毋庸另議科條至分賠一節查鳳陽關近臨淮河上通豫省惟冬底春初水淺易冰間有阻滯蕪湖關木稅出自川廣上游谿水發生始能浮送出江是以冬春之交抵關較少其餘時月兩關均有參差衰旺不一向係以贏補絀通年牽算亦未有缺額之事祇上年蕪湖因水災稍歉乃不經有之事未可以爲比例也惟查兩關經管道員非如他處鈔關監督必屆一年期滿方行更換者可比

如一年之內迭遇交代則所值之時候不一卽
稅務之盈縮攸分此贏彼絀勢亦難免若照各
歸各任之例恐苦樂不均卽欲就月分定以衰
旺而風色無定雨水或歧衰旺亦難以預定兼
之偶遇閏月卽難分派臣再四思維一經更改
章程諸多窒礙應請照舊辦理萬一稍有短缺
卽仍照通年考核舊例著落經徵之員按月日
勻攤著賠以歸平允所有臣遵

旨籌議緣由謹會同兩江總督臣孫玉庭恭摺覆
奏伏祈

皇上聖鑒謹

奏

道光四年二月十八日具

奏三月二十三日奉到

硃批依議認真妥辦欽此

請借

帑興修無爲州江壩捐子

奏爲無爲州江壩工程緊要援案借

帑興修以衛田廬而重民命仰祈

聖鑒事竊查上年皖省沿江被水無爲一州地勢最

低被災尤重經

臣

勘明具

奏並將該州江壩工程浩大民力難支卽須借項
興修情形附片陳明又請將工程專交新任知
州劉用錫督同委員鳳陽縣主簿屠慕曾勘估
酌量借項興修一面恭摺

奏報奉

硃批知道了欽此經

臣

飭行藩司轉飭該州俟圩水

消退卽趕緊勘辦茲據藩司徐承恩詳稱親抵該州督同劉用錫屠慕曾逐一履勘並添委試用縣丞王澄張聘之未入流楊應甲幫同辦理隨勘得無爲州南臨大江地勢低窪所屬五百九十餘圩全賴一線江堤爲之捍禦每遇江水盛漲時設有沖缺不特該州全境受害卽毗連之廬江巢縣和州含山難免波及兼以西北濱近巢湖及黃白二湖附城各水均由泥汊口東

南入江一經淤塞則內水停積而江水不無倒漾之虞上年江湖異漲州境全淹數月始退皆因江壩被沖併下河水口淤塞以致瀰漫四潰自應趕緊興修查自青岡山三壩起至劉家渡攔河止擇其卑矮殘缺間段修補加培其王家渡以下至張家灣一帶江溜頂沖應內由陸家墩接楊灣長堤至老河埂攔河壩止一律修殘補缺幫厚加高以下自永成圩達太湖圩至界溝碑止亦間段修補共計工長八千六百二十三丈內估修工長二千六百六十三丈又勘估

修築古家磯蔣公堤張公堤古家圩張謝圩楊
青圩方家橋張家灣陳家圩永成圩六壩尾等
處各缺口共計工長三百九十三丈又勘估修
築黃絲灘殘缺舊壩並於頂沖處所添築月壩
一道共計工長二千六百八十二丈又勘估挑
挖引河一道自下河口河埂起至姚家溝止共
計工長八百十九丈總共需土方銀四萬七千
六百三十四兩三錢五分四釐查乾隆二十九
年三十四年該州被水沖堤及五十二年閏河
築壩均經

奏請借項興修分年攤徵還款在案應請援案借帑興修在於該州通境民田項下分作六年照糧攤徵還款等語臣查該州田畝甚多工程緊要轉瞬春水發生攸關民命業經藩司勘定擇要興修均係刻不可緩之工相應籲懇

天恩俯准借項興修以資保衛所有估計土方銀兩臣因爲時已迫仰體我

皇上厯念民生之至意卽於前次

奏明扣留報撥銀內飭司發給該州督令董事紳耆等作速分領興修所借

帑項應由該州通境民田項下分限六年照糧攤徵歸款其河壩各工壓佔挖廢田畝工竣查明照例

題豁至此項借

帑挑築江壩引河係民借民辦攤徵還款並請免其造冊報銷以省案牘謹會同協辦大學士兩

江總督

臣

孫玉庭恭摺具

奏伏乞

皇上聖鑒謹

奏

道光四年三月初十日具

奏四月十一日奉到

硃批另有旨欽此同日奉到道光四年三月二十六日內閣奉

上諭陶澍奏江壩工程緊要援案借帑興修一摺皖省無爲州濱江臨湖地勢最低上年江壩被衝並下河水口淤塞以致州境均被淹浸自應趕緊興修俾資捍禦據該撫委員逐段勘丈估計分別修補加培並添築月壩挑挖引河共需土方銀四萬七千六百三十四兩零此項工程浩繁若責令民

修誠恐力有未逮加恩著准其援照歷屆成案借
項興修卽於前次奏明扣留報撥銀內飭司如數
發給該州督令紳耆等分領作速興辦毋任稍有
草率偷減所借銀兩著於該州通境民田項下分
限六年照糧攤徵還款並免造冊報銷其河壩各
工壓佔挖廢田畝該撫於工竣時查明照例題豁
以紓民力該部知道欽此

查勘靈璧縣減黃引河借項興挑摺子

總督會稿

奏爲查勘靈璧縣減黃引河仿照上游抽溝估需土方銀數借項攤徵奏祈

聖鑒事竊查江安兩省天然峯山閘下引河由睢寧靈璧泗州以達於洪湖爲減洩黃流要區前經臣孫玉庭等查勘睢邑自閘壩起至靈璧界止河身淤墊

奏請於緊要各段逐一估挑抽溝以順溜勢其下游安徽靈璧縣境內河道高仰處所亦應仿照徐屬河埝一律抽溝以免壅遏當經移會臣陶

澍并飭委睢南營守備秦盛會同護廬鳳道程
懷璟確勘稟辦去後茲據該道等稟稱勘得減
黃引河自睢靈交界郭家莊起至靈泗交界大
王廟止計河長四千六百餘丈河身多被淤墊
高仰不一兩岸隄埝及睢河南岸亦多被水沖
刷單薄殘缺之處就河道中擇其緊要必不可
緩者逐加勘估仿照上游辦法分作七段挑挖
前四段高仰處所計長一千四百九十丈後三
段地勢亦高有礙宣洩必得一律挑挖計長八
百七十丈自第一段郭家莊起至第七段王家

場止共估需銀五千九百九十六兩六錢六分四釐至東西南三岸隄埵單薄殘缺之處此次挑挖淤土卽可就近擇要酌加培築以爲目前權宜之計所需土方銀兩該縣素稱積歉之區民力實有不逮應請借

帑興修分年攤徵歸款等情併飭據安徽藩司徐承恩查明所估工需均屬撙節請照歷次借帑成案借給興工等情前來臣等覆查靈璧縣境內自處睢寧下流睢寧引河業經挑挖靈璧境內自須一律勘辦俾水勢無所壅阻委據該道等就

河身高仰擇其緊要必不可緩者勘明估計自應仿照上游迅速舉工所需土方銀兩原應勸諭居民捐辦惟該縣係積歉之區體察情形民力實有不逮合無仰懇

皇上天恩俯准借

帑挑挖分年攤徵歸款瞬屆麥熟農忙若由司庫動給往返需時卽就近在鳳陽關庫先行發辦再由司庫撥還較爲便捷除飭司移行動給飭令該府縣乘時趕緊照估如式挑挖尅期完竣報候驗收不使稍有草率虛冒飭取勘估冊結

聲明分攤年限照例

題報外所有靈璧縣減黃引河借

帑挑挖抽溝緣由臣等謹會同河道總督臣張文

浩恭摺具

奏伏乞

皇上聖鑒謹

奏

道光四年四月初一日具

奏五月初二日奉到

硃批另有旨欽此同日奉到道光四年四月十六日

內閣奉

上諭孫玉庭等奏靈璧縣減黃引河請借項興工一摺江安兩省天然峯山閘下引河爲減洩黃流要區江蘇雖邑境內業經奏准挑挖安徽靈璧地處下游自應一律興辦俾水勢無所壅阻據該督等委勘河身高仰處所仿照上游逐段挑挖抽溝並將挑出淤土培築隄埝估需土方銀五千九百九十六兩零該縣係積歉之區若責令民修誠恐力有未逮著准其借項興辦就近由鳳陽關庫先行如數發給仍由安徽司庫卽行撥還該督等飭令

該府縣乘時趕緊如式挑挖尅期完竣核實驗收
毋使稍有草率偷減所借銀兩著分年攤徵還款
該部知道欽此

請將鳳潁泗三府州屬遣軍流徒秋審各犯酌
歸巡道審轉摺子

總督會稿

奏爲請將皖省鳳潁泗三府州屬尋常遣軍流徒
及秋審各犯酌歸該管巡道審轉以免拖延而
昭矜卹仰祈

聖鑒事竊照安徽一省刑名事體夙稱繁劇其鳳陽
潁州泗州三屬接近徐豫濱臨洪湖離省均各
千里民俗犷悍最難馴伏臣孫玉庭每因公事
節加整飭臣陶澍前因北閩周歷遐隅逐加體
察訪得匪棍數十名先後附片

奏拏懲辦地方稍資救輯因思該三屬一切案件較之別屬爲多各犯每於解司提審時或畏罪狡展或挾仇妄扳在該犯等明知長路迢迢對質無人遂爾任意刁噬而犯供旣翻例應提証質訊彼良善之民慮及長途跋涉往往畏累潛藏累月經年始得傳案解質比及訊結無辜獲雪而千里往返已不勝其苦累矣又況解犯路費均係仰給有司該三屬案繁累重實已不支各牧令旣虞賠墊卽難保無化大爲小之見彼鄰証又苦拖累更不免有私和匿報之事究其

流弊適以啟刁長奸於治理大有關係至秋審人犯解省來往每須月餘日久則防範難周路遠則貲費尤重種種情形實多未便伏查距省寫遠之秋審人犯定例責成巡道研鞠遣軍流徒應行咨結之案巡撫例不提審今鳳潁泗三屬各犯解省情形諸形掣肘似應量爲變通以歸便益應請

旨將鳳陽潁州二府泗州一州所屬人犯除罪應斬絞及命案內應擬徒軍流等罪者仍解省由司勘轉外其尋常遣軍流徒並人命僅祇擬徒案

犯均歸該管廬鳳道審勘徑詳督撫衙門分別核辦一面移明臬司備案毋庸解犯至省以免拖延而清庶獄其一切限期及出入處分均照臬司之例辦理設或翻供卽就近提証質結其秋審人犯亦卽解道審錄發回移知臬司核定實緩詳辦倘有鳴冤翻易者卽由道解省復審以昭核實臣等仍隨時察核如該道審斷不公立卽據實劾叅不敢稍有徇隱如此分別辦理庶案可速結犯無疎虞官民均有裨益臣等往返札商意見相同並據臬司具詳前來謹合詞

恭摺具

奏伏乞

皇上聖鑒

訓示謹

奏

道光四年四月二十二日具

奏五月二十二日奉到

硃批另有旨欽此同日奉到道光四年五月初八日

內閣奉

上諭孫玉庭等奏尋常遣軍流徒及秋審各犯請歸

巡道審轉一摺皖省鳳潁泗三府州屬距省均各
千里招解人犯長途防範難周該督等奏請量爲
變通著照所請嗣後鳳陽府潁州府泗州所屬人
犯除罪應斬絞及命案內應擬軍流等罪者仍解
省由司解轉外其尋常遣軍流徒並人命僅祇擬
徒案犯均歸該管廬鳳道審勘徑詳督撫衙門分
別核辦一面移明臬司備案毋庸解犯至省以免
拖延一切限期處分均照臬司之例辦理設或翻
供卽就近提証質結其秋審人犯亦卽解道審錄
發回移知臬司核定實緩詳解倘有鳴冤翻異者

著卽由道解省覆審該督撫仍隨時察核如該巡
道審斷不公卽據實劾叅毋稍徇隱欽此

續查未豁賠款遵議追補摺子

奏爲安徽省續查未豁賠款遵

旨籌議追補仰祈

聖鑒事竊照皖省各員賠罰銀兩經前撫

臣

孫爾準

暨臣節次詳查具

奏接准部咨欽奉

諭旨戶部議覆陶澍奏安徽省原報請豁銀米各項
除業經准免及例不准豁之攤扣部借養廉銀兩
外其查有案據在恩詔以前者共銀五萬一千三
十三兩零米七百六十四石零俱著准其豁免此

外查無案據銀四萬四千六百七十兩零著不准
其豁免至續查請豁銀七十七萬三千六十七兩
零錢八百九十七串零米麥豆一萬九千七石零
該省查報旣在恩詔以後仍令該撫妥籌追補以
重帑項欽此臣當卽欽遵將原報請豁數內已免
未免及應行查覆各款照依部議飭司分別查
明造冊咨部核辦至續查請豁各款前因確核
案據均在嘉慶二十五年八月二十七日欽奉
恩詔以前與部議准免條款相符經前撫臣孫爾準
奏奉

諭旨添造入冊茲部議以查報在

恩詔以後未便援免行令妥籌追補等因

臣遵復督

同藩司徐承恩檢核全案通盤合計竊思籌補舊欠必須兼杜新虧從前籌補之法惟藉攤捐而攤捐卽爲展轉增虧之根現在裁減捐款禁止流攤以清交代而嚴存庫甫經

奏定章程自未便遽有更張又滋糾蔓且清查墊解兩案各員應追銀兩已多如將此次捐賠銀款同時併追誠恐操之太急勢必挹彼注茲轉啟虧挪之漸自應分別款項追補兼施庶於

帑項有裨查原冊開報因公挪移項下請免銀二萬九千四十九兩零從前查辦時因各員俱經結報家產核與准免條款相符是以續經彙造入冊今核各員欠繳各款究係本身虧缺與捐賠有間且其中如韓寶鏐一員前因建平交代另案抄追業已限內全完例應開復此時自當仍行勒追所有各款銀兩應請查照各員欠數按六次清查追補章程依限追繳又子孫代賠項下請免銀四萬二千五百七十三兩零錢三百五十七千零米一百四十二石零核查原案

亦係虧缺應一併追繳請將各員欠數仍按章程分別子孫有無出仕依限著追均不准另起追限致滋延宕又代賠民佃等欠項下請免銀一十一萬六千二百八十八兩零錢一百五十八千零穀一萬二千三十五石零米麥豆三千三百一十七石零又賠償承變項下請免銀一萬八千四百八十七兩零又按日分賠項下請免銀一十萬五千九百二十八兩零米四百七十七石零又因公罰賠項下請免銀二十七萬五千七百四十三兩零米三百六十六石零又

上司同官分賠項下請免銀五萬四千一百二十八兩零穀一千六百石米一千六十七石零以上五款內中本有十九年以前各員開報之件因五次清查時提歸另冊未及彙報茲部議亦以查報在後與續查各款均未援免臣等細加覆核所有前五款銀錢米穀或因書役辦公借欠無著或因前任抵交變價不敷或捐攤前任或代賠他人均事非經手人非同案實係牽連著賠若與本身虧缺之項一體依限勒追不特輕重無別且追項更多力難同繳仍屬有名

無實自應另酌期限措繳俾歸實濟應請將以上五款銀兩併數核計俟清查正款追完起限接追數在一千兩以內者限一年完繳一千兩以上至三千兩者限二年三千兩以上至五千兩者限三年五千兩以上至一萬兩者限五年一萬兩以上者統限八年全完至追賠勻捐項下請免銀一十二萬五百七十五兩零錢三百八十二千零查核此項銀錢係因地方隨時應辦公事例無開銷由司飭令州縣捐貲辦理間有飭捐未繳之處交代時因有飭捐文書不得不

列款移交其實祇係虛欠並未挪缺錢糧其隨時捐辦之公事亦早經辦竣毋須追補歸款本應汰除留於交代冊內徒滋纏轉應將此項欠捐各款仍請

旨全行豁免庶款項不致分歧交案胥歸核實又因公核減項下請免銀一萬二百九十一兩零此項係該州縣等挪款辦公因什物昂貴例價之外不無賠貼歷年既久積數成鉅以致挪款無歸究屬因公賠累且各員中多有早經物故者若再向子孫名下著追勢必往返咨查致滋懸

宕自應酌籌彌補以省滋擾查五次清查案內
有各員繳存捐款無關正雜錢糧者共銀一萬
三百一十六兩零現存司庫應留爲通省辦公
之用請將前項因公核減銀兩卽於捐存辦公
銀內劃數彌補以公濟公實有裨益至皖省清
查前經五次尙多未實未盡此次接奉

諭旨查辦業已得其確數分別應追應補應豁經
臣奏定章程十條分飭各屬以追欠杜虧並於查
覆存庫摺內欽奉

上諭嗣後交代各款其在嘉慶二十五年以前總以

現在清查核定數目爲準將前此報部參差之處一體更正等因欽此從此糾轄全清祇須按照章程辦理毋庸再有清查其前次

奏明設局業已裁撤日後倘有不肖州縣隱匿侵吞惟當隨時隨事據實叅辦按律懲治自足以儆貪劣而廉善之員不致因人受累庶益濯磨以仰副

聖主澄飭吏治之至意所有遵

旨妥籌追補緣由謹會同協辦大學士兩江總督

臣

孫玉庭合詞恭摺覆

奏伏乞

皇上聖鑒

訓示遵行謹

奏

道光四年五月十二日具

奏六月十五日奉到

硃批另有旨欽此同日奉到道光四年五月二十八
日內閣奉

上諭陶澍奏安徽省續查未豁賠款遵旨籌議追補
一摺著照所議原冊開報因公挪移項下銀兩俱

係各員本身虧缺與捐賠有間該撫卽查照各員
欠數按六次清查追補章程勒限追繳子孫代賠
項下銀米各款分別各員子孫有無出仕依限著
追不准另起追限致滋延宕代賠民佃等五款銀
錢米穀俟清查正款追完起限接追數在一千兩
以內者限一年一千兩以上至三千兩者限二年
三千兩以上至五千兩者限三年五千兩以上至
一萬兩者限五年一萬兩以上者統限八年全完
至追賠勻捐項下銀一十二萬五百七十五兩零
錢三百八十一千零係因飭捐未繳列款虛欠無

須追補著卽全行豁免其因公核減項下一萬二百九十一兩零實因該州縣等辦公賠累著卽於捐存辦公銀內劃數彌補以省滋擾該部知道欽此